

Kahi bo manii

Vura

Teo peho vuri, a bua si otei na vavaamaagee roho. Ere manii bo kahi. Meori paa teitei vamataa rakaha. Teo peho bon me manii paa sue ki bene kahi, “Maagee, ean toro kaporo anaa, bean kaporo anaa, enaa repaa kaporo vaaruu vuan.”

Merau mea bua si otei paa vamatatopo, meori paa vakaporo. Me kahi paa kaporo bene manii. Kaporo me kaporo, me kaporo vamatamataa rakaha bona, mepaa kavara.

Me kahi paa sue, “Bara! Nao pahi an ruene, ean re tara tea vaabeabeman!” Me manii paa nao, mepaa tara vo ruene, mepaa tara vo enei, e kahi paa kaporo vamataa rakahau bona. Merau me manii paa sue vaaruu ki bona, “Bara, maagee, hio vaaru pahian, enaa re kaporo vaaru vuan.”

Me kahi paa hio, me manii paa taneo me kaporo me kaporo gunagunaha bata bona maa moonae. Mepaa kavara. Kavara vai, me manii paa sue ki bene kahi, “Bara maagee, kao vaaruu pahi an ruene, ean re tara o vaabeabeman.”

Merau, me kahi paa nao, me toboha tara nana, evehee tara vareasi ni bono kaporo te manii. O peho si hum sa paku vamataa haa e. A tainanae na sun oha nana bara na pakara rakaha nana. Mepaa sue ki bene manii, “Maagee! Ean koma paa kaporo vahata rakaha avuanaa, tara han tea bua tainanaa!”

Meori paa taneo tea vaasue, meori vaasue, me manii paa sue, “Aigee! Enaa he paa kaporo vamataa rakaha pahiu vuan ta!” Me kahi paa sue, “Aha! Ean sa tara haa nom a bua tainanaa, to pakara rakaha nana!”

Tavusu koa teebona meori paa vaasuasun, meori paa vatevatete. Me kahi paa vatete bene manii, me manii paa rosin hiava teo naono. Me rosin peha batana, e kahi he koto nao bona vihinae. E manii he tea kehi bata tea peha hiava, mepaa koto ruvisi nao bona vihinae.

Me bean tara te manii nomanai, o hum to koto roho e kahi na hiki nana to vunuu. Bara e kahi me, be tara bene manii, orepaa rake rakaha tea asun vamate koa bona.

Mepaa kuhoo te kara tete.



Me rosin peha batana, e kahi he koto nao bona vihinae.